

稼

門

文

鈔

稼門文鈔卷四

序

皖江汪志伊著

節韻幼儀序

後世人才不如古者非降才殊也從孩提失教始古人胎教已豫而家庭與保傅之教之善不待言矣後世養子自能食能言時卽戲導以毆罵侮慢爲笑樂入學而又妄以讀書求富貴爲誘掖驕情奢侈習慣成性畢生壹似嬰兒禮義廉恥蕩然矣求其在家孝於親敦宗睦族立朝忠於君禮賢下士不數數觀甚至蕩檢踰閑傾覆顛仆而莫之省蓋病根皆伏於蒙養之不正

也夫養正莫善於禮耳目手足非禮無所持循動靜云爲非禮無所檢束而德性之調人倫之教罔不賴禮以維之我

國家兢兢於民風士習教化咸周凡有董勸之責者其可忽諸吾嘗閱陸氏桴亭集有欲採禮經中之曲禮少儀參以近禮編成一書或三字或五字節爲韻語務令易曉名曰節韻幼儀合下便教他知行並進云云惜乎其說善而未編有成書繼閱小學詩禮五篇竊喜陳北溪已先桴亭爲之乃反覆體貼匪特古禮不諧今俗古字不便童子卽如九容中之手容恭足容重仍如經渾括言之而未詳如何恭如何重之儀則童子安知推其

意而見諸行久之得屠氏義英童子禮三十條禮法浸備但語重句長又非童穉所能誦其疎漏須補者亦多茲編一依其法并採禮經及諸儒蒙訓古字易以時字長句易以短句節爲韻語四十章仍桴亭之名曰節韻幼儀寧質毋文寧簡毋繁以求副知行並進之說似於古人教童子習禮歌詩之意粗有近似以立弟子誠敬之根本而爲

國家教化之階梯云爾貽譏文人固所不惜也

### 九容廣註序

予嘗著節韻幼儀一書凡檢束身心人事父兄出事師長及學

堂肄業之儀所以導童子於禮法而培其德性者固已明且備矣乃行之家塾十歲以外之成童能知亦漸能行不復有驕侈習氣頗收養正之功惟十歲以內之穉子覺知行並進之艱質魯者尤未易成誦因思橫渠教人專以知禮成性變化氣質爲先我曷弗於先之中更求其先者爲穉子立一簡易之法爰取禮經中九容以爲矩蓋九者於身切近而易曉也但九容曰重曰恭曰端曰止曰靜曰直曰肅曰德曰莊其言精而渾非穉子所能推其意而見諸行卽鄭註舉欲遲云云其言亦約而該非穉子所能推其類以及其餘故又因其註而廣之先列以要者

卽教以義方之意也次列以母者卽弗納於邪之意也邪悉去  
則自歸於正又卽克己復禮之意也末則因容而推原於心者  
是又望教之者於穉子熟讀之後臨行之時提而省之曰重不  
重在足而所以重不重者在心也隨時讀一句卽提省一句並  
察其尋常舉動用言提省之俾穉子知舉動或是或非皆由於  
心當亦漸漸曉然自加檢點蓋始則能制外以養中而久則自  
由中以應外循循然立定根基而不至爲習俗所移也雖然穉  
子於此九容固應習之熟之而成童進學幼儀之候豈遂可棄  
此九容乎蓋其後由幼儀而挾四書五經之心發揮於人倫日

用之間不過精透此九容而已卽入神入化亦未有出此九容之外孔子所謂不踰矩者是也予復取劉念臺所輯九容嘉言懿行並新增數條附於後俾有徵信教者或於稗子讀廣註之後隨時講論以廣其見聞而鼓其志氣亦可若并此令稗子讀之則又非立簡易之法之意也

寧化吳氏改編譜序

嘉慶元年丙辰

詔直省府州縣銜舉孝廉方正欽惟

重華殊恩千古曠典舉非其人則無以副

聖天子明揚至意而負闇與疏之譏於國於天下丁巳仲秋予奉命旬宣七閩旋膺封圻重任察前之備舉者多與輿論迕竊思七閩稱海濱鄒魯豈楊游劉李蔡朱胡黃陳真熊林諸君子遂竭扶輿清淑氣而猥以瑣瑣者當之也檄郡邑另爲公明選先後報舉八十餘人予旁詢博證得砥行無間言者僅十人試其才識堪

召用者則吳子清夫裒然爲舉首戊午秋遂達於

朝清夫名賢湘乙卯進士於己未

廷試後就教南歸適部徵引



見予敦之行而清夫以器小福薄固辭且曰教授亦有事功未嘗無毫髮裨

聖化予甚惜廣文不足展其德與才而亦不復強也日者以改編吳氏譜索予序予循覽之益想見其爲人清夫自以倖科名而不強勉學問惕惕抱慙於先世其孝思可知矣怡庭公焚吳韶券清夫鼓掌稱善其廉隅可知矣且以譜顯揚先祖無美而虛之誣不可爲惟求理之安於可知者又於此知清夫之方且正選舉易爲耳目誤吾今乃差自慰耳抑吾於譜尙有議者予昔守蘇郡纂修家乘恪遵原例曰重考實曰圖支系曰詳紀

曰嚴嫡庶曰明繼嗣曰畧生女曰斥異端曰謹命名若不以例而以文則吾家八十三世一十四支安得瞭如指掌乎今清夫用史記世家之體依世系連屬成文文則茂矣抑知史記勵記世家不及其後茲計清夫以上至甲生公才十世自清夫以下至繩曾才三世作者易閱者亦無難爪爬綿於數十世百世系長支繁依世家體斷難綜貫吾恐墨未燥而又有改編者焉世俗譜不可從盍循左圖右史遺意圖以支開則支系有條而不紊傳以人具則人事詳載而無遺俾後世懷水源木本敦宗睦族之思者有所依據相與續編於勿替毋謂門寒祚薄無庸沾

沾譜例爲也我觀吳氏自三世碧庵公七世簡庵公皆舉鄉飲賓至十世而有清夫又以孝廉方正舉世德之孚已章章若是我聞清夫嘗以高曾再世儒不獲一衿爲憾顧乃祖已遊太學乃父已補博士弟子員至清夫且由選拔而科甲詩書之報又章章若是昔汝南薛包好學篤行公車特徵至拜侍中吾得於清夫之孝廉方正信之潁川陳寶爲太邱長累辭徵命而紀羣相繼爲公卿吾又得於清夫之待銓廣文不赴部徵信之

荒政輯要叙

嗟乎天災流行何代無之堯水九載湯旱七祀不聞有一民之

失所者胥以人事補造化之窮所謂有荒歲無荒民者此也我朝

聖

聖相承敬

天勤民孜孜夙夜凡平時所以教農桑興水利裕積貯尙節儉敦風俗以爲民生計者精益求精休養生息百數十年矣其間偶值旱澇及蝗蛟冰雹颶風等災一經飛章奏報上厯

宸衷軫念民困卽不惜千百萬帑金迅加賑恤蠲免錢糧更不計其數並截撥正供漕糧及碾運鄰近倉穀以爲平糶煮粥之

需是蠲賑之典已逾常格猶且

諄諭封疆大臣不得稍存靳情率屬實心經理毋任胥役侵漁  
務使災黎均沾實惠

誥誠復極周詳蓋

聖心勤求民瘼者誠也豈漢唐宋元明諸代小補之術所能及  
哉至若各省大小官吏身任地方非無愛民救患之真心況考  
覈森嚴何敢泄視而臨時查辦往往有善有不善者推原其故  
才具有長短歷練有淺深兼之災務原屬繁難民情又多急迫  
事本易於滋弊吏遂緣以爲奸非得其人不能理非得其法不

不能理憶乾隆丁未歲予以霍州牧赴豐鎮讞案因知大同府屬上秋霜敗稼春又渴雨至六月大饑牧令諱之予飛稟撫軍勒宜軒

奏明卽命予歷一廳二州六縣督同查辦於流民則資送回籍於貧民則煮粥充饑區分極重次重停徵錢糧戶別極貧次貧發倉賑濟間有倉穀不敷接濟則借庫項選殷商循環糴糶事竣歸欵凡若此者或循成例或出心裁祇求於災民有濟不計其他及旋署考諸古人成法竟亦有合者自是留意荒政益勤由府道而藩臬而巡撫每遇歉年頗有定見嘉慶甲子吳中低

窪田畝或因春夏雨多或因清黃盛漲被水偏災者四十二廳  
州縣予寢食不安將勘明災困分數及小民拮据情形據實奏  
奉

硃批所見甚是並

頒恩旨蠲緩與賑糶兼施計蠲緩銀五十一萬三千餘兩米麥  
豆五十二萬九千餘石賑卹銀二十九萬四千餘兩平糶穀二  
十四萬一千餘石於是寮屬與殷實紳士咸知激勸或捐貲煮  
賑或出米減糶士民悅豫無不感戴

皇恩頌聲洋溢乙丑春陰雨頻仍無傷稽事惟洪澤湖因旱

掣開義壩致淮揚極低十一州縣被淹異常予親往查勘會同鐵冶亭制軍奏荷

聖恩允撥銀十三萬二千餘兩先行撫卹並

敕仍察看成災輕重奏請

加恩不可稍有諱飾當卽欽遵行令承辦各官認真清查核實辦理先是鐵制軍防汛住劄清江較爲切近會予札委賢能守令及佐雜官分赴各邑協查其有邑令不勝任者易之凡查明極次貧民口數卽臚列榜示村中迨秋間江寧徐州松江海州太倉各州郡間有山田被旱棉地被蟲勘不成災胥歸淮揚災



案辦之計蠲緩銀四十七萬六千三百餘兩米麥豆二十五萬一千四百二十餘石其淮揚正賑展賑連前撫卹共銀一百五十九萬四千八百八十餘兩節次奏蒙

聖鑒疊沛

恩旨有加無已敬刊謄黃遍張村鎮胥吏不能侵蝕民賴以安然寸心惴惴更恐黃河盛漲湖水溢流實爲數百萬生靈田廬之患其預籌妥辦之方尤未可苟且從事也古人荒政散見簡編良法美意固多偏見私智亦不少復加揀擇取其宜古宜今者別類分門成書十卷每卷中但求事有次第可行而朝代之

前後不復拘焉其叢言不能分者提作綱目列於卷首各目並  
政輯要所有臨時清查妥辦之法全載於第三第四兩卷中地  
方官及委員必須逐條參究力行方免遺濫錯誤之咎其前後  
八卷皆載前人良法美意或以發明三四卷未盡之意或以推  
廣三四卷未備之法若因地因時以制其宜於災黎大有裨益  
而種德亦無涯涘要之予破冗繁輯是書刊發各屬官蓋冀歷  
練深者益擴其措施歷練淺者亦有所依據諸君子如果善學  
古人大發其不忍人之心實行其不忍人之政於以仰承

聖意敷布

皇仁將見有荒歲而無荒民亦如唐虞三代之世矣豈不懿哉

常熟楊氏祭田讀書田二記之序

天下之最易荒蕪者莫如心田所謂槁木死灰是也然天下之最易生發者亦莫如心田所謂泉達火然是也蓋心如穀種而田則腔子具四端統萬善道理原自森然苟涵養其本根則滿腔之生意盎然矣若剝削其本根則滿腔之生意索然矣審是必去其害心者而後可以養心養心者卽朱子所云敬便在腔子裏靜便是養得本根深也幾見本根深而枝葉有不茂焉者哉予於楊氏元峯徵之矣昔予筦漕政駐虞山卽聞元峯力行

善事名而元峯卒未嘗一至公門予雖未識元峯之面  
其心之所養者深矣越十有三年癸亥予復來撫三吳而元峯  
旋下世其鄉之人以元峯生平孝行無間言籲請

旌表予於此又知其克盡爲子之心矣遂達於

朝以維風化不寧惟是其上而建宗祠清祀產捐義田葺義莊  
諸大端非善繼其親之心曷能尊祖敬宗以睦族如此其周哉  
推而下之一置祀田於麻嘉橋一置讀書田於敦本堂其自爲  
計及爲子孫計而務綿世澤於勿替者非推廣其親裕後之心  
不至此詩曰孝思不匱永錫爾類其是之謂歟今元峯哲嗣名

景仁者以祭田讀書田二記就正於予予閱其規條分明允當儼然從方寸中畫井分疆有條而不紊然則楊氏之祭田讀書田卽謂之楊氏之心田可也嗟乎心田者子孫之苗也得其養無物不長失其養無物不消彼世之富若貴者或刻薄起家或貪婪封殖欲爲子孫百世之計其喪心幾不堪自問矣匪特多藏厚亡不旋踵而禍隨之且金多心侈徒爲純袴膏粱之子弟作酒色蒲博之資目未瞑而家已蕩然無存是自害而并害其子孫者或幸其一敗塗地或譏爲天道好還予則矜其心之愚且迷而未聞君子之大道也夫元峯之不刻不貪彰彰在人耳

目間豈必有鑒於是而矯之歟蓋其心田養之也深心深則其  
遠故其治產也不爲子孫之身計實爲子孫之心計我知楊氏  
世世子孫守祭田而爲士并食報讀書田而登科筮仕必且油  
油然生忠孝廉讓之心卽今之子孝孫賢掇巍科居清要者其  
明徵已吾故曰本根深而枝葉必茂也雖然心田者人同賦於  
天地卽天地之心也吾豈獨爲楊氏言者

涂存悔先生存誠堂稿序

文者發於心聲也世未有心不遂於理粹於義而能發於聲鏘  
然成一家清和之文者顧或謂傳世之文與售世有間不知彼

欲售此欲傳皆不免有問世之見存文益工文之衰也惟不問世而祇問心昕夕皇皇焉殫厥心惟經心是挾探至理於乾坤研大義於精一斯能超然以天地聖賢之心爲心含精華博旨趣其文不求工而自工不必售於世而斷無不售亦不必傳於世而卒無不傳何則理義人心之所同地不限朔南時不分今古心心相賞者必心心相傳若合符節爾嘉慶庚午春淪莊侍御出其大父存悔先生存誠堂稿及家傳見示予受而展卷卽不禁舉然高望曰是殆孟子所謂君子存之者歟是殆學本六經真能以天地聖賢之心爲心者歟否則何以顏其堂必曰存

誠而表其字又必曰存悔也公暇輒取先生稿而讀之掃陳言  
抒心得活潑潑地靈氣往來一如鳶之不能已於飛也魚之不  
能已於躍也喜怒哀樂之不能已於發也是無他蓋由析理選  
義之功深故無題不鹽其腦敲其髓攝其神而方之牆東老人  
一下筆瓦屋皆震者有過之無不及雖然理也義也言之非艱  
行之惟艱讀家傳知先生恂恂寡言笑居家孝友無閒言初補  
建昌郡學弟子員旋以第一人食餼家故貧授徒自給教必以  
器識爲先及官長寧訓導論文正大一如授徒時尤以忠孝廉  
節相勗勵蒙其化以成材者指不勝屈其子弟輩先後餼於庠



舉於鄉者甚多而淪莊侍御視學湖北懃懃懇懇以正士習振  
文風爲己任至公至明之頌洋溢江漢間尤爲予所目覩耳聞  
者蓋非守先生之教不及此則先生之能先行其言而後從之  
者亦可概見矣嗟乎四時行百物生天地之心也五事用五典  
徽聖賢之心也其散見於六經中者粲然皆有用之學天下士  
大夫能如先生以天地聖賢之心爲心者幾人哉乃先生竟不  
得大用於世僅以司鐸一邑終有足慨者然以先生之言教身  
教而使門下士及子若孫皆能心先生之心登賢書成進士羣  
相和其聲以鳴

國家之盛已彰彰若是吾知士林聞風嚮往莫不奉先生爲正宗者則以先生之文發於心聲而理義曉暢足以悅天下後世之人心也記曰善歌者使人繼其聲其斯文無不售亦無不傳之謂歟

續卷四

乘氣實學序

嘗玩葬書開端乘生氣一言而知郭叅軍得葬法之要矣夫葬止八尺土耳顧何以能收千里百里來龍及四面砂水之氣於一穴而穴又必規規焉取象於太極圓暈者何哉蓋土爲氣體有土斯有氣其行也因地之勢其聚也因勢之止勢來形止是爲全氣莫非無極之真二五之精妙合而凝所謂一物一太極也且太極卽圖書虛中之象而土實居中凡水必得土而後能生木火必得土而後能成金是土主四行旺四時而有生生不

已之機焉故曰生氣然生氣則以陽來陰受陰來陽受陰中有陽陽中有陰一仰一覆一噓一吸而成也若孤陰孤陽不相交媾則爲死氣矣且生氣以五行順生而得也若逆尅則又爲殺氣矣此其間挨生棄死化殺生權全恃乎神明乘氣之法者一失其法經云吉地凶葬與棄屍同其斯之謂歟凡爲人子孫者顧可不爲此懼而矢志於學乎夫學乘生氣之法有二焉一曰形氣不特審穴之止知生氣之聚也必先原龍之起察生氣之來也生氣之來有水以導之生氣之止有水以界之生氣之聚有砂以衛之無風以散之不但此也千里來龍惟看到頭一節

脉如仰掌徵陽落之生氣脉如覆掌徵陰落之生氣二氣交感則入手到穴必有隱隱隆隆之圓暈以聚陰冲陽和之生氣所謂穴土者是也而內氣止生在此矣其外氣橫形上乘金分水如毬圓受氣充滿其來始真則接化生腦孩兒頭之生氣焉下相水合水如簷滴生氣止聚其止方明則收金魚蝦鬚螭眼之生氣焉既有真水以界合必有真砂以夾輔微砂如蟬翼薄貼穴旁以遮風彎砂如牛角抱過穴脚以關水則生氣無散漫之虞若左右龍虎砂乃一身之親手親足護穴收氣毫無滲漏則生氣益聚均謂之印木可也古云外砂不及內砂力外水不及

內水親不其然乎一日理氣非舍形氣而空言理氣也龍有胎  
伏伏在後乃出脉以施精胎在前乃接脉以受精則陰陽交媾  
而龍爲生氣之龍矣穴有胎息胎在腹以氣內收而緩乘息離  
懷以氣外洩而急乘則陰陽嗟吸而穴爲生氣之穴矣然地德  
上載之生氣卽天星下臨之精氣楊廖各有九星名雖異而理  
則同蓋九星乃五星之變而五星實九星之祖所謂葬乘生氣  
必準於天星以占龍脉之貴賤必極之五星九星以分正變之  
吉凶者此也用先天以統龍龍得先天之生氣用後天以布局  
局得後天之生氣二十四山應天之二十四氣六十透地應六

十甲子七十二穿山應七十二候三百六十五度卽春之三百六旬有六日用以察陰陽配龍坐向而生氣乃得一一乘之避壬癸甲乙之孤虛取丙丁庚辛之旺相則金於是乎分而生氣亦於是乎乘左右龍脉來左右耳受氣則山向於是乎立而生氣亦於是乎乘砂以脉山推消尅煞而收生旺水以局向論放休囚而納生旺則砂水於是乎消納而生氣亦於是乎乘至若喫緊扼要以乘生氣者端在乎細審緩急偏正之真情善用進退饒減之良法凡此皆乘生氣之實理卽爲乘生氣之實學也實學乎實理乎人之氣傳於子孫猶木之氣傳於實也實而芽

芽而花花而復實生生不已之機決於形決於理亦決於學故  
顏斯集曰乘氣實學嗟乎此乘氣實學雖一集而分十三卷乃  
求地之法耳豈求地之本乎不觀易曰立天之道曰陰與陽立  
地之道曰柔與剛立人之道曰仁與義乎吾於是又知陰陽爲  
天之生氣剛柔爲地之生氣仁義爲人之生氣也夫仁爲安宅  
義爲正路凡爲人父祖及爲人子孫者苟舍正路而弗由曠安  
宅而弗居則自己之生氣先自斬絕矣又安能承受天地陰陽  
冲和剛柔摩盪之生氣以福遺骸而蔭後裔乎是故歸重於本  
務本而本自立則其道尤生生不已乃以補郭叅軍葬書所未



詳者爾



稼門文鈔卷五

跋書後

皖江汪志伊著

恭跋

御製耕織圖詩

臣惟圖象之設原於河洛蓋河圖洛書五居中以建皇極而馭乎四方用敷錫厥庶民昭然立君師之統焉土居中以含元氣而旺於四時普美利於不言隱然寓農桑之經焉欽惟我

皇上苞符闡蘊

茂育因時

續

三聖之鴻謨

覃八紘之駿惠

御製耕織圖詩四十有六章

教敦本業

誨勗民功織悉靡遺同化工之肖物艱難畢照若瑣事之親經

臣迴環恭誦仰見

皇上本欽若

昊天之心爲

敬授人時之政萬邦黎獻固已涵濡於

化育周浹於

生成猶必

頒發

睿藻

宣示臣隣

欽念乎康功

勤思乎道濟誠欲俾小大庶官敷釋

敬

天之心以寅清於作訛成易恪守

勤民之政以永賴於平成修和也

臣

謹按周官三百有六十而

農桑之官數幾什一大司徒之職掌建土地之圖辨其山林川澤原隰之名物其在遂人則又以土地之圖經田野其在土訓則又道地圖以詔地事夫圖之藏於官府達於邦國者豈繫司徒遂人土訓所自爲哉周頌有之曰王釐爾成言君命其臣也曰來咨來茹言臣受命於君也又曰旣昭假爾率時農夫言臣旣受命於君卽不可不致君命於其民也然則象魏縣書正歲頒朔其圖布自朝廷司徒建之遂人經之士訓道之凡以宣

德慰民望爾今封疆大吏仰蒙

聖天子俯賜篇章如親

訓迪豈覩丁男丁女之辛勞能忘三耘三眠之節候導揚

盛美勸相精勤固其職也竊聞漢代循吏率以農桑課最黃霸  
有鄉亭條教召信臣有均水約束九真牛耕教於任延也桂陽  
蠶織教於茨充也唐宋以來則如李大亮墾田之法王方翼關  
鍵之編王愷之勸課藝植姜彧之新桑徧野非弗播厥循聲無  
忝司牧顧或奏績一邑未能澤被九州或收效一時無由綿延  
萬載何則桔槔之用不足以爲霖也絡緯之鳴不足以爲績也

非有肝食宵衣良法美意振興而恢廣之小惠未徧民奚以孚哉

至德

太和厥惟

盛世

聖主以軫念民依之

寶訓

昭示諸臣諸臣奉以勵厥吏暨厥民敷天之下至於海隅日出寒耕暑織蔚爲醇風同類八蠶臻茲上瑞矣

臣

出身田畝忝任

封圻謹率所司勸課原野肅捧

瑤簡朗暢

謨韶欣見夫戴茅蒲衣襪礪具曲植籩筐者靡不翹首企足樂聞

天語敬告以

御製浸種耕耘諸章知詩之所云秬秠糜芑者未若我

皇上之講明其氣候也敬告以

御製耜耨碌礪諸章知詩之所云耒耜趙鎛者未若我

皇上之詳核其器用也敬告以



御製春籥簸籥諸章知詩之所云春榆簸蹂者未若我  
皇上之備述其成功也敬告以

御製浴蠶炙箔諸章知詩之所云懿筐桂輩者未若我  
皇上之曲喻其經營也敬告以

御製染色攀花諸章知詩之所云載績孔陽者未若我  
皇上之賁飾其文章也敬告以

御製翦帛成衣諸章知詩之所云流火授衣者未若我  
皇上之彌綸其函被也敬告以

御製祭神祀謝諸章知詩之所云飴香椒馨者未若我

皇上之釐定其報祀也於是穀人絲人樂事勸功襲乎鼓之軒  
乎舞之莫不躋堂稱觥羣祝

萬壽無疆臣用是敬錄

天章謹撫圖帙勉効司徒遂人土訓之職遠紹周頌昭假釐成  
之規以期仰副

聖天子歛福錫極之德意於萬一湖廣總督臣汪志伊拜手稽  
首恭跋

書康茂園方伯珍藏大觀帖後

唐柳公權對穆宗曰心正則筆正固因書以諫也然書法實不

外此郝陵川嘗發明其意云心正則氣定氣定則腕活腕活則  
筆端筆端則墨注墨注則神凝神凝則象滋無意而皆意不法  
而皆法若太嚴則傷意太放則傷法於此見古人之心無所不  
用其極欲學古人之書者必先求古人之心然後可觀此宋拓  
大觀帖十卷自倉頡以至唐宋人書燦然大備而晉人尤居大  
半其體勢卽或低昂迴翔甚至跌蕩欹斜而用筆則無不出之  
以中鋒者是卽所謂筆正而心正從可知矣嗟乎書亦一藝也  
非正心且不能精况修身齊家治國也乎蓋柳太師之所見者  
大且遠所言者約而賅矣今茂園先生論師帖法得其意而不

必襲其迹力爲我用而後變化從心非與柳太師心心相印歟  
吾是以願學而樂爲之書

書李紹鄴藏宋文信國公琴冊後

嘉慶五年春吳生清夫言其友李孝廉紹仁故弟紹鄴名璵宴  
者藏宋文信國公琴時人題冊頗富因屬清夫向乃弟副貢紹  
臯借觀琴陰刻松風一榻雨瀟瀟萬里封疆不寂寥獨坐瑤琴  
遣世慮君恩猶恐壯懷消時景炎元年蒙恩遣問召入夜宿青  
原寺感懷之作譜於琴中識之文山五十六字天祥宋瑞之章  
一印越下又有二寸許一方印曰仁至義盡似屬後人所增冊

題半閩人謂此琴舊藏何氏蒼壁齋茲歸紹鄴不免人琴之感  
或謂楚弓楚得亦可無憾嗟乎此琴信國公手澤也琴爲何琴  
人爲何人乎而何氏得有之乎且自宋流傳不知幾姓而人何  
氏手未幾歸紹鄴紹鄴又亡區區孤桐竟如厓山之舟沈淪而  
不得返也尙可云無憾乎昔余守蘇郡獲觀范文正公小楷書  
伯夷頌卷按跋宋亡流入燕京元李侯截得之歸之范氏一時  
士大夫皆樂道之明神宗時入王弇州質庫弇州後亦歸之范  
氏題曰余豈敢以百金市義顧滿吾甘棠勿翦之願云耳善哉  
李王二公見遠而不蔽於近可爲嗜古者鑑矣此琴翁

學會拓本作長歌嗣按試吉安以所藏信國公像留奉於廨  
文氏祠堂并以此琴拓本及歌懸青原寺方丈之壁迨爲紹鄴  
題冊旣書舊歌復識前事勸勉之情不已見乎辭哉嗟乎此琴  
信國公手澤也閩人其可曰楚之弓乎抑忍慶楚之得乎清夫  
其與紹仁紹舉商之歸璧文氏使天下士大夫歌頌三山李氏  
如總管李何如若疑紹鄴亡不忍弃其所愛是則徒知愛兄弟  
而未知其心也觀紹鄴自序其詩曰無絃中頗覺謾謾松風響  
動窓壁丞相忠魂當於是寄從知紹鄴之心與李總管王尙書  
翁閣學諸君子有同然耳慰文山之忠魂卽以傳紹鄴身後之

名於不朽

代歸劉蕺山先生像卷因書其後

吳生賢湘日捧念臺先生像卷商歸劉氏先生爲有明正學直臣炳諸史傳更詳湯潛菴跋語無俟蠡測者之喋喋耳矣顧吾竊惟此卷之不世奉蕺山祠堂而寧化雷氏有之也翠庭雷副憲公力程朱學乾隆甲戌乙亥間校士兩浙士林仰之或按臨會稽拜瞻遺像愛莫能釋以爲仰止景行之範焉夫先賢手澤子孫兢兢世守勿失孝也他人偶得之必歸先賢子孫義也巖巖氣象尤非手澤比乎噫先生靈爽實式憑之

之孫光榮誰爲默牖其衷一旦舉而昇之吳生生爲翠庭同里  
後進丐余歸之不補翠庭闕憾而慰先生之靈爽矣乎予故樂  
襄潢書之以告劉氏孝子慈孫并百世喻義之君子

書林生衍源慎齋存槩後

林生仲騫不汲汲舉子業而嗜學唐宋八家文特以慎齋存槩  
就正於予噫予素不能文烏能知人之文而論人之文哉雖然  
予觀林生以慎顏其齋且自序而爲之箴知必非苟且自欺於  
隱微者也爰就其立心命意引而伸之夫人心有假者修之於  
昭昭肆之於冥冥惟慎爲真心昔孔門心法真傳記其所慎齊



戰疾而外曰慎言曰慎行曰慎思曰慎德凡以心爲身主則對越上帝而措施於家國天下間者不容稍參以僞也故一動一靜必以真心持之然操持於事爲之著必先審察於幾微之初書曰人心惟危道心惟微易曰幾者動之微嘻幾已動矣其危微之介歟動尙微矣其人心道心方萌之始歟人不及知己獨知之卽須決天人之戰實用其力以勝之譬如行道起步不誤於歧途進步必由乎正路否則差毫釐而終千里於此見慎獨之功尤扼其要曾子揭之於大學蓋謂意之誠不誠在乎獨之慎不慎也子思揭之於中庸蓋謂道之離不離亦在乎獨之

不慎也嗟乎獨之慎不慎卽隱微之理欲好惡之欺慊所由分  
然則林生獨處一齋其亦審所用力矣乎且夫不慎則妄過慎  
則蕙妄則吾不爲林生慮矣而特慮蕙心乘之綱常日用間畏  
首畏尾豈知慎而未知有禮歟夫禮嚴而泰者也戰戰兢兢之  
小心非卽坦坦蕩蕩之大道乎雖然慎修者又不可不思有以  
永之也身隨在而心有獨知不特屋漏闇室中然也卽大庭廣  
衆中亦有然也推之一息百年無不然也慎厥初鮮克有終今  
豈異於古所云耶千尋之木或摧於片斧萬斛之舟或沉於寸  
隙夫非惟聖罔念作狂之驗歟蓋聖狂之轉移在念一念初萌

無時可忽其精以察之一以守之克以復之者要不外此敬以致慎之真心自堯舜禹湯文武周孔以來胥是心也惟曾子子思獨得其宗又恐或失其傳此學庸之所爲作也是學庸之書不皆闡典謨訓誥論語之心傳而爲千古至大至精之文乎然文非口談而躬行必從慎獨始林生果於此審其幾焉安其身而後動易其心而後語將惟道是修乎亦猶天之鳶淵之魚不能已於飛躍也將惟德是蓄乎亦猶富人之屋不能已於潤也其發爲文也必更有不同於唐宋八家之所爲文者吾又烏能量其學之所至也哉

書李子仙移居圖後

天下有廣居焉居之而不可移也斷斷然矣心安則隨遇而安如顏氏陋巷可也若心安而隣有難安如孟氏三遷可也今子仙出移居圖屬書予閱其自跋云並無修竹茂林峭壁蒼崖之勝槩非厭故而喜新也明矣想亦擇仁而處之意居多夫擇仁必依於仁誠能欲立立人欲達達人不特一里一鄉漸被其仁之澤將見仁之量肫肫乎充塞於四方其爲廣居何如也吾故樂得書之并志數言於此

書太倉沙溪鎮恤養會信徵錄後

昔漢海州三年不雨于公因新太守求其故始得白節孝竇氏之冤而大雨隨之從知天常以時雨洗人間之奇冤而於節孝之婦爲尤重且苦節者之子孫未有不昌大者自古及今史載歷歷不爽又知天恒以厚福酬人間之苦心而於苦節之婦爲尤隆然天道每顯於身後而莫能周於生前惟蘇州彭氏創立恤嫠會洵足補造物之缺憾也予守鎮江時曾集郡之紳士趙德修等八十四人醵白金壹萬兩生息半增寶晉書院膏火半作恤嫠經費并立規條通詳立案以垂久遠今復撫三吳往來京口或曰寡婦之利孔長則固衆君子始終不懈之力而予何

有焉茲太倉陸孝廉名堃者具言其州之沙溪鎮士庶曹璞柴桂戴繩武等同孝廉於嘉慶四年冬仿蘇鎮兩郡恤嫠會序例行之并出同善堂信徵錄索予一言以爲獎勸予則以爲獎勸不在予之虛言而在人之實心夫實心非出於不忍人之心乎卽如嫠婦身爲未亡人不忍背其夫之恩義而誓死靡他也志在藐諸孤不忍棄其夫之嗣續而必撫之成立也爲母家存大體不忍以風聲玷詩禮之門也苦況豈受人憐不忍以嫌疑貽舅姑之羞也甚至貧極難以自存而人卒不能奪其志所謂餓死事小失節事大也嗟乎一守節也而大孝大慈大義皆出其

中豈第可爲巾幗勸哉抑亦足以愧天下之爲鬚眉男子者雖然鬚眉男子中亦大有能推不忍人之心者卽如恤嫠會其小引曰嫠婦之尤可憫者莫甚于士族是不忍於士族之心所以重禮義而養廉恥者大也周其衣食是不忍其饑寒交迫之心所以養名節而保幼孤者宏也給以醫藥是不忍其沈疴不起之心所以救其生者切也備棺代葬是不忍其遺骸暴露之心所以送其死者周也其扶助總以無親族可倚者爲主是又不忍於有初繼終之心所以防冒濫而計長久者至也嗟乎堂曰同善真能推不忍人之心以行不忍人之政於一鄉者豈第可

爲士庶勸哉抑亦足以愧天下之握政柄而爲民牧者書曰天  
視自我民視天聽自我民聽蓋謂民易虐而天難欺也凡爲牧  
令者果以牧民爲心并以恤廢爲重而與鄉士大夫盡心於其  
間不使孤啼於門婦歎于室上千天地之和必將風雨時而流  
澤長也噫是其補造物之缺憾者不尤大且遠也哉



稼門文鈔卷六

傳

皖江汪志伊著

外大父敬菴公傳

敬菴公姓胡氏諱廷選字以時志伊外大父也世爲吾桐望族  
列膠庠登科第代有名賢公之考滔遠公家故豐好善樂施尤  
稱長者元配詹孺人無子乃立所愛堂兄徵則公次子進爲後  
繼配嚴孺人生公甫六月而滔遠公卽捐館賴孺人鞠育之教  
誨之無少寬縱公秉性敦敏卽角就傳如成人每從塾中歸輒  
知展卷吟誦博孺母歡心及弱冠摩挲遺編痛父業未竟下帷

樓中日與孝廉雲圃鴻毅諸昆弟饜飫六經不輟寒暑而公尤  
沉潛反覆於宋儒之學力追聖賢之所以爲心以爲實踐躬行  
之本故其爲文不尚綺詞洞穿理窟試輒見擯於有司援例入  
成均考授經歷需次久之黜然曰誤矣吾以半歲孤賴母得長  
長乃離母乎哉遂絕意仕進定省無間晨昏事兄進唯謹怡怡  
一室不啻同胞居平尤好義人有不能昏喪者必捐貲以襄其  
事至排難解紛賙貧恤寡無吝吝亦無德色能繼父風吾父愔  
菴公少時肄業迎水菴雖爲公壻尙未登公門而公常趨視之  
喜其文有剛勁氣獎勵有加饋遺無虛日凡此皆吾父吾母三

平所津津樂道者也外大母李孺人監生子山公次女有婦德  
孝養孀姑克佐公志生四舅氏伯曰燠字亞衡仲曰烜字榮階  
叔曰炳字豹文季曰焯字次明均業儒能守義方之訓女五長  
卽志伊之母志伊生最晚翁之德輝不可卽矣觀母氏之溫恭  
淑慎可以驗公閨範之宏焉公宅曰曹莊地逼沙河洪水爲災  
隄屢決田園半被沙淤家以漸落公於雍正庚戌年三月二十  
五日酉時卒距生康熙乙卯年正月初九日寅時享壽五十有  
五閱七載乾隆丁巳外大母李孺人亦卒合葬於曹家冲祖塋  
之內丑山未向又歷十餘年家益艱諸舅氏暨諸外兄先後謝

世惟存外兄作賓夫婦兩人伶仃孤苦居隄旁數椽茅屋岌岌有傾圯憂壬辰歲予下第旋里將所積館金購得胡家墩梁姓屋宇並園圃令其遷居別置田畝給以佃種頗稱小康庚戌冬作賓赴蘇郡視予詢其年已五旬尙未得子因分俸爲納側室方冀一綫可延詎至壬子春而作賓計音條至予和淚致書外兄蘊華擇其文行兼優之第四子澤中立爲作賓嗣復撥給良田以資耕讀予嘗讀陶靖節孟府君傳蘇文忠述程公遺事朱文公記祝公遺事淒然不勝水源木本之思碌碌吏事未暇爲公作傳僅勒碑以表其藏寸心耿耿實有愧於淵明諸君子之

情深文明而莫能自釋也今外家重修家譜索序於予並屬傳  
公事蹟以垂不朽嗟予小子夫何能文惟就向所聞於吾父母  
之口傳者切實書之並附叙作實遷居立嗣數事於簡末嗚呼  
積善餘慶天道之常以公積善如此其誠而餘慶偏爽其報幾  
令人歎彼蒼之夢夢焉然蘊華以令子繼其後志伊復以腴產  
贍其家將見承先啟後丕振家聲未必非公積善之餘慶也

稼門文鈔卷七

辨

皖江汪志伊著

知己辨

得一知己可以不恨古今來同此慨歎果爲恨事歟然吾之所恨者不在人之不知己而在己之不知己夫己之心生秉天理或存或亡己知之乎己憤憤於旦晝清夜間而不知此心出入何鄉則不知己矣己之身日涉人倫或叙或讟己知之乎己逖逖於尊親長幼間而不知此心愛敬何在則不知己矣己之幼而學也或性命或辭章或介于舜蹠或淆於儒釋己知之乎己

日誦聖賢書而不知幼學何事則不知己矣己之壯而行也或王道或霸術或念在君民或計存身家已知之乎己日食國家祿而不知壯行何政則不知己矣至己之存與沒也順焉否寧焉否己知之乎己藐焉混然中處而不知存何以體其受沒何以歸其全則終於不知己矣噫己終于不知己蓋謂沒斯已矣若猶未也一息尙存豈遂以愚柔自諉而甘終於不知己乎鏡以塵而昏以磨而明果反己而一一自問其生平所爲且卽己而時時自察于日用之間必有不同於未自問未自察之先者炯然難昧當歷歷而知己之居於何等矣顧一旦幸而知己之

如一隙微明稍縱焉卽逝則已烏可若用力若不用力悠忽而失此本體未息之微明乎從此惺惺焉號號焉懲已忿窒已欲改己過遷己善力追古之人而務爲己之學未爲晚矣否則人之不知己輕固宜黜亦宜正其深於知己也恨胡爲者